

Yāqūb

¹ Yih khat Allāh aur Khudāwand Īsā Masīh ke khādim Yāqūb kī taraf se hai.

Ğhairyahūdī qaumon meñ bikhre hue bārah Isrāīl qabiloñ ko salām.

Īmān aur Hikmat

² Mere bhāiyo, jab āp ko tarah tarah kī āzmāishon kā sāmnā karnā parے to apne āp ko khushqismat samjheñ, ³ kyoñki āp jānte haiñ ki āp ke īmān ke āzmāe jāne se sābitqadmī paidā hotī hai. ⁴ Chunāñche sābitqadmī ko baṛhne deñ, kyoñki jab wuh takmīl tak pahuñchegī to āp bālīgh aur kāmil ban jāeñge, aur āp meñ koi bhī kamī nahīn pāi jāegī. ⁵ Lekin agar āp meñ se kisī meñ hikmat kī kamī ho to Allāh se mānge jo sab ko faiyāzī se aur bağhair jhirkī die detā hai. Wuh zarūr āp ko hikmat degā. ⁶ Lekin apnī guzārish īmān ke sāth pesh kareñ aur shak na kareñ, kyoñki shak karne wālā samundar kī mauj kī mānind hotā hai jo hawā se idhar-udhar uchhaltī bahtī jātī hai. ⁷ Aisā shakhs na samjhe ki mujhe Khudāwand se kuchh milegā, ⁸ kyoñki wuh dodilā aur apne har kām meñ ġhairmustaqilmizāj hai.

Ğhurbat aur Daulat

⁹ Pasthāl bhāī Masīh meñ apne ūñche martabe par fañhr kare ¹⁰ jabki daulatmand shakhs apne adnā martabe par fañhr kare, kyoñki wuh janglī phūl kī tarah jald hī jātā rahegā. ¹¹ Jab sūraj

tulū hotā hai to us kī jhulsā dene wālī dhūp meñ paudā murjhā jātā, us kā phūl gir jātā aur us kī tamām khūbsūratī khatm ho jātī hai. Us tarah daulatmand shakhs bhī kām karte karte murjhā jāegā.

Āzmāish

¹² Mubārak hai wuh jo āzmāish ke waqt sābitqadam rahtā hai, kyoñki qāym rahne par use zindagī kā wuh tāj milegā jis kā wādā Allāh ne un se kiyā hai jo us se muhabbat rakhte haiñ.

¹³ Āzmāish ke waqt koī na kahe ki Allāh mujhe āzmāish meñ phañsā rahā hai. Na to Allāh ko burāī se āzmāish meñ phañsāyā jā saktā hai, na wuh kisī ko phañsātā hai. ¹⁴ Balki har ek kī apnī burī khāhishāt use khūñch kar aur uksā kar āzmāish meñ phañsā detī haiñ. ¹⁵ Phir yih khāhishāt hāmilā ho kar gunāh ko janm detī haiñ aur gunāh bālígh ho kar maut ko janm detā hai.

¹⁶ Mere azīz bhāiyo, fareb mat khānā! ¹⁷ Har achchhī nemat aur har achchhā tohfā āsmān se nāzil hotā hai, nūroñ ke Bāp se, jis meñ na kabhī tabdīlī ātī hai, na badalte hue sāyon kī-sī hālat pāī jātī hai. ¹⁸ Usī ne apnī marzī se hameñ sachchāī ke kalām ke wasile se paidā kiyā. Yoñ ham ek tarah se us kī tamām makhlūqāt kā pahlā phal haiñ.

Sunanā Kāfī Nahīn Hai

¹⁹ Mere azīz bhāiyo, is kā khayāl rakhnā, har shakhs sunane meñ tez ho, lekin bolne aur ghussā karne meñ dhīmā. ²⁰ Kyoñki insān kā ghussā wuh rāstbāzī paidā nahīn kartā jo Allāh

chāhtā hai. ²¹ Chunāñche apnī zindagī kī gandī ādateñ aur sharīr chāl-chalan dūr karke halimī se kalām-e-muqaddas kā wuh bīj qabūl kareñ jo āp ke andar boyā gayā hai, kyoñki yihī āp ko najāt de saktā hai.

²² Kalām-e-muqaddas ko na sirf suneñ balki us par amal bhī kareñ, warnā āp apne āp ko fareb deñge. ²³ Jo kalām ko sun kar us par amal nahīñ kartā wuh us ādmī kī mānind hai jo āñe meñ apne chehre par nazar dāltā hai. ²⁴ Apne āp ko dekh kar wuh chalā jātā hai aur fauran bhūl jātā hai ki maiñ ne kiyā kuchh dekhā. ²⁵ Us kī nisbat wuh mubārak hai jo āzād karne wālī kāmil sharīat meñ ghaur se nazar dāl kar us meñ qāym rahtā hai aur use sunane ke bād nahīñ bhūltā balki us par amal kartā hai.

²⁶ Kyā āp apne āp ko dīndār samajhte haiñ? Agar āp apnī zabān par qābū nahīñ rakh sakte to āp apne āp ko fareb dete haiñ. Phir āp kī dīndārī kā izhār bekār hai. ²⁷ Khudā Bāp kī nazar meñ dīndārī kā pāk aur bedāgh izhār yih hai, yatīmoñ aur bewāoñ kī dekh-bhāl karnā jab wuh musībat meñ hoñ aur apne āp ko duniyā kī ālūdagī se bachāe rakhnā.

2

Tāssub se Khabardār

¹ Mere bhāiyo, lāzim hai ki āp jo hamāre jalālī Khudāwand Ūsā Masīh par īmān rakhte haiñ jānibdārī na dikhāeñ. ² Farz kareñ ki ek ādmī sone kī angūthī aur shāndār kapre pahne hue āp kī jamāt meñ ā jāe aur sāth sāth ek gharīb ādmī bhī maile-kuchaile kapre pahne hue andar

āe. ³ Aur āp shāndār kapre pahne hue ādmī par khās dhyān de kar us se kaheñ, “Yahān is achchhī kursī par tashrif rakheñ,” lekin ġharīb ādmī ko kaheñ, “Wahān kharā ho jā” yā “Ā, mere pāñwoñ ke pās farsh par baiñh jā.” ⁴ Kyā āp aisā karne se mujrimānā khayālāt wāle munsif nahīn sābit hue? Kyoñki āp ne logoñ meñ nārawā farq kiyā hai.

⁵ Mere azīz bhāiyo, sunēñ! Kyā Allāh ne unheñ nahīn chunā jo duniyā kī nazar meñ ġharīb hain tāki wuh īmān meñ daulatmand ho jāeñ? Yihī log wuh bādshāhī mīrās meñ pāeñge jis kā wādā Allāh ne un se kiyā hai jo use pyār karte hain. ⁶ Lekin āp ne zarūratmandoñ kī be'izzatī kī hai. Zarā soch leñ, wuh kaun hain jo āp ko dabāte aur adālat meñ ghasīt kar le jāte hain? Kyā yih daulatmand hī nahīn hain? ⁷ Wuhī to Īsā par kufr bakte hain, us azīm nām par jis ke pairokār āp ban gae hain.

⁸ Allāh chāhtā hai ki āp kalām-e-muqaddas meñ mazkūr shāhī shariyat pūrī karen, “Apne pañosī se waisī muhabbat rakhnā jaisī tū apne āp se rakhtā hai.” ⁹ Chunāñche jab āp jānidārī dikhāte hain to gunāh karte hain aur shariyat āp ko mujrim ṭhahrātī hai. ¹⁰ Mat bhūlnā ki jis ne shariyat kā sirf ek hukm toñā hai wuh pūrī shariyat kā quşūrwār ṭhahartā hai. ¹¹ Kyoñki jis ne farmāyā, “Zinā na karnā” us ne yih bhī kahā, “Qatl na karnā.” Ho saktā hai ki āp ne zinā to na kiyā ho, lekin kisī ko qatl kiyā ho. To bhī āp us ek jurm kī wajah se pūrī shariyat toñne ke mujrim ban gae hain. ¹² Chunāñche jo

kuchh bhī āp kahte aur karte haiñ yād rakheñ ki āzād karne wālī shariyat āp kī adālat karegī. ¹³ Kyoñki Allāh adālat karte waqt us par rahm nahīn karegā jis ne ķhud rahm nahīn dikhāyā. Lekin rahm adālat par ġħālib ā jātā hai. Jab āp rahm kareñge to Allāh āp par rahm karegā.

Īmān Nek Kāmoñ ke Baġħair Murdā Hai

¹⁴ Mere bhāiyō, agar koī īmān rakhne kā dāwā kare, lekin us ke mutābiq zindagī na guzāre to us kā kyā fāydā hai? Kyā aisā īmān use najāt dilā saktā hai? ¹⁵ Farz karen ki koī bhāī yā bahan kapron aur rozmarrā roṭī kī zarūratmand ho. ¹⁶ Yih dekh kar āp meñ se koī us se kahe, “Achchhā jī, Khudā hāfiz. Garm kapre pahno aur jī bhar kar khānā khāo.” Lekin wuh ķhud yih zarūriyāt pūrī karne meñ madad na kare. Kyā is kā koī fāydā hai? ¹⁷ Ĝharz, mahz īmān kāfī nahīn. Agar wuh nek kāmoñ se amal meñ na lāyā jāe to wuh murdā hai.

¹⁸ Ho saktā hai koī etarāz kare, “Ek shakhs ke pās to īmān hotā hai, dūsre ke pās nek kām.” Āen, mujhe dikhāeñ ki āp nek kāmoñ ke baġħair kis tarah īmān rakh sakte haiñ. Yih to nāmumkin hai. Lekin maiñ zarūr āp ko apne nek kāmoñ se dikhā saktā hūn ki maiñ īmān rakhtā hūn. ¹⁹ Achchhā, āp kahte haiñ, “Ham īmān rakhte haiñ ki ek hī Khudā hai.” Shābāsh, yih bilkul sahīh hai. Shayātīn bhī yih īmān rakhte haiñ, go wuh yih jān kar ķhauf ke māre thartharātē hain. ²⁰ Hosh meñ āen! Kyā āp nahīn samajhte ki nek āmāl ke baġħair īmān bekār hai? ²¹ Hamāre bāp Ibrāhīm par ġħaur

karen̄. Wuh to isī wajah se rāstbāz ṭhahrāyā gayā ki us ne apne beṭe Is'hāq ko qurbāngāh par pesh kiyā. ²² Āp khud dekh sakte haiñ ki us kā īmān aur nek kām mil kar amal kar rahe the. Us kā īmān to us se mukammal huā jo kuchh us ne kiyā ²³ aur is tarah hī kalām-e-muqaddas kī yih bāt pūrī huī, “Ibrāhīm ne Allāh par bharosā rakhā. Is binā par Allāh ne use rāstbāz qarār diyā.” Isī wajah se wuh “Allāh kā dost” kahlāyā. ²⁴ Yoñ āp khud dekh sakte haiñ ki insān apne nek āmāl kī binā par rāstbāz qarār diyā jātā hai, na ki sirf īmān rakhne kī wajah se.

²⁵ Rāhab fāhishā kī misāl bhī leñ. Use bhī apne kāmoñ kī binā par rāstbāz qarār diyā gayā jab us ne Isrāilī jāsūsoñ kī mehmān-nawāzī kī aur unheñ shahr se nikalne kā dūsrā rāstā dikhā kar bachāyā.

²⁶ Ĝharz, jis tarah badan rūh ke bağhair murdā hai usī tarah īmān bhī nek āmāl ke bağhair murdā hai.

3

Zabān

¹ Mere bhāiyo, āp meñ se zyādā ustād na baneñ. Āp ko mālūm hai ki ham ustādoñ kī zyādā sakhtī se adālat kī jāegī. ² Ham sab se to kaī tarah kī ḡhaliyāñ sarzad hotī haiñ. Lekin jis shakhs se bolne meñ kabhī ḡhaltī nahīñ hotī wuh kāmil hai aur apne pūre badan ko qābū meñ rakhne ke qābil hai. ³ Ham ghore ke muñh meñ lagām kā dāhānā rakh dete haiñ taki wuh hamāre hukm par chale, aur is tarah ham apnī marzī se us kā pūrā jism chalā lete haiñ. ⁴ Yā

bādbānī jahāz kī misāl leñ. Jitnā bhī baṛā wuh ho aur jitnī bhī tez hawā chaltī ho nākhudā ek chhotī-sī patwār ke zariye us kā rukh ḫik rakhtā hai. Yoñ hī wuh use apnī marzī se chalā letā hai.

5 Isī tarah zabān ek chhotā-sā azu hai, lekin wuh barī barī bāteñ kartī hai.

Dekheñ, ek baṛे jangal ko bhasm karne ke lie ek hī chingārī kāfī hotī hai. **6** Zabān bhī āg kī mānind hai. Badan ke dīgar āzā ke darmiyān rah kar us meñ nārāstī kī pūrī duniyā pāī jātī hai. Wuh pūre badan ko ālūdā kar detī hai, hāñ insān kī pūrī zindagī ko āg lagā detī hai, kyoñki wuh khud jahannum kī āg se sulgāī gaī hai. **7** Dekheñ, insān har qism ke jānwaroñ par qābū pā letā hai aur us ne aisā kiyā bhī hai, khāh janglī jānwar hoñ yā parinde, reñgne wāle hoñ yā samundarī jānwar. **8** Lekin zabān par koī qābū nahīñ pā saktā, is betāb aur sharīr chīz par jo mohlak zahr se labālab bharī hai. **9** Zabān se ham apne Khudāwand aur Bāp kī satāish bhī karte hain aur dūsroñ par lānat bhī bhejte hain, jinheñ Allāh kī sūrat par banāyā gayā hai. **10** Ek hī muñh se satāish aur lānat nikaltī hai. Mere bhāiyo, aisā nahīñ honā chāhie. **11** Yih kaise ho saktā hai ki ek hī chashme se mīṭhā aur kaṛwā pānī phūṭ nikle. **12** Mere bhāiyo, kyā anjīr ke darakht par zaitūn lag sakte hain yā angūr kī bel par anjīr? Hargiz nahīñ! Isī tarah namkīn chashme se mīṭhā pānī nahīñ nikal saktā.

Āsmān se Hikmat

13 Kyā āp meñ se koī dānā aur samajhdār hai? Wuh yih bāt apne achchhe chāl-chalan se zāhir

kare, hikmat se paidā hone wālī halīmī ke nek kāmoñ se. ¹⁴ Lekin ķhabardār! Agar āp dil meñ hasad kī karwāhaṭ aur ķhudgħarzī pāl rahe haiñ to is par shekhī mat mārnā, na sachchāī ke ķhilaf jhūt boleñ. ¹⁵ Aisā fakhr āsmān kī taraf se nahīn hai, balki duniyāwī, ġhairrūhānī aur Iblīs se hai. ¹⁶ Kyoñki jahān hasad aur ķhudgħarzī hai wahān fasād aur har sharīr kām pāyā jātā hai. ¹⁷ Āsmān kī hikmat farq hai. Awwal to wuh pāk aur muqaddas hai. Nīz wuh amnpasand, narmdin, farmānbardār, rahm aur achchhe phal se bharī huī, ġhairjānidbār aur ķulūsdil hai. ¹⁸ Aur jo sulah karāte haiñ un ke lie rāstbāzī kā phal salāmatī se boyā jātā hai.

4

Duniyā se Dostī

¹ Yih larāiyān aur jhagare jo āp ke darmiyān haiñ kahān se āte haiñ? Kyā in kā sarchashmā wuh burī khāhishāt nahīn jo āp ke āzā meñ lartī rahtī haiñ? ² Āp kisī chīz kī khāhish rakhte haiñ, lekin use hāsil nahīn kar sakte. Āp qatl aur hasad karte haiñ, lekin jo kuchh āp chāhkte haiñ wuh pā nahīn sakte. Āp jhagarте aur larte haiñ. To bhī āp ke pās kuchh nahīn hai, kyoñki āp Allāh se māngte nahīn. ³ Aur jab āp māngte haiñ to āp ko kuchh nahīn miltā. Wajah yih hai ki āp ġhalat nīyat se māngte haiñ. Āp is se apnī ķhudgħarz khāhishāt pūrī karnā chāhkte haiñ. ⁴ Bewafā logo! Kyā āp ko nahīn mālūm ki duniyā kā dost Allāh kā dushman hotā hai? Jo duniyā kā dost bananā chāhtā hai wuh Allāh

kā dushman ban jātā hai. ⁵ Yā kyā āp samajhte hain ki kalām-e-muqaddas kī yih bāt betukī-sī hai ki Allāh ghairat se us Rūh kā ārzūmand hai jis ko us ne hamāre andar sukūnat karne diyā? ⁶ Lekin wuh hameñ is se kahīn zyādā fazl bakhshtā hai. Kalām-e-muqaddas yoñ farmātā hai, “Allāh mağhrūroñ kā muqābalā kartā lekin farotanoñ par mehrbānī kartā hai.”

⁷ Ĝharz, Allāh ke tābe ho jāeñ. Iblīs kā muqābalā kareñ to wuh bhāg jāegā. ⁸ Allāh ke qarīb ā jāeñ to wuh āp ke qarīb āegā. Gunāhgāro, apne hāthon ko pāk-sāf kareñ. Dodilo, apne dilon ko makhsūs-o-muqaddas kareñ. ⁹ Afsos kareñ, mātam kareñ, khūb roeñ. Āp kī hañsī mātam meñ badal jāe aur āp kī khushī māyūsī meñ. ¹⁰ Apne āp ko Khudāwand ke sāmne nīchā kareñ to wuh āp ko sarfarāz karegā.

Ek Dūsre kā Munsif Mat Bananā

¹¹ Bhāiyō, ek dūsre par tohmat mat lagānā. Jo apne bhāī par tohmat lagātā yā use mujrim Ჰhahrātā hai wuh sharīat par tohmat lagātā hai aur sharīat ko mujrim Ჰhahrātā hai. Aur jab āp sharīat par tohmat lagāte hain to āp us ke pairokār nahīn rahte balki us ke munsif ban gae hain. ¹² Sharīat dene wālā aur munsif sirf ek hī hai aur wuh hai Allāh jo najāt dene aur halāk karne ke qābil hai. To phir āp kaun hain jo apne āp ko munsif samajh kar apne paṛosī ko mujrim Ჰhahrā rahe hain!

Shekhī Mat Mārnā

¹³ Aur ab merī bāt sunēñ, āp jo kahte haiñ, “Āj yā kal ham fulāñ fulāñ shahr men jāeñge. Wahāñ ham ek sāl thahar kar kārobār karke paise kamāeñge.” ¹⁴ Dekheñ, āp yih bhī nahīñ jānte ki kal kyā hogā. Āp kī zindagī chīz hī kiyā hai! Āp bhāp hī haiñ jo thorī der ke lie nazar ātī, phir ghāyb ho jātī hai. ¹⁵ Balki āp ko yih kahnā chāhie, “Agar Khudāwand kī marzī huī to ham jieñge aur yih yā wuh kareñge.” ¹⁶ Lekin filhāl āp shekhī mār kar apne ghurūr kā izhār karte haiñ. Is qism kī tamām shekhībāzī burī hai.

¹⁷ Chunāñche jo jāntā hai ki use kyā kyā nek kām karnā hai, lekin phir bhī kuchh nahīñ kartā wuh gunāh kartā hai.

5

Daulatmando, Khabardār!

¹ Daulatmando, ab merī bāt sunēñ! Khūb roeñ aur giryā-o-zārī kareñ, kyoñki āp par musībat āne wālī hai. ² Āp kī daulat sar̄ gaī hai aur kīre āp ke shāndār kapre khā gae haiñ. ³ Āp ke sone aur chāndī ko zang lag gayā hai. Aur un kī zangālūdā hālat āp ke ķhilāf gawāhī degī aur āp ke jismon ko āg kī tarah khā jāegī. Kyoñki āp ne in ākhirī dinon men apne lie ķhazāne jamā kar lie haiñ. ⁴ Dekheñ, jo mazdūrī āp ne fasal kī kaṭāi karne wāloñ se bāz rakhī hai wuh āp ke ķhilāf chillā rahī hai. Aur āp kī fasal jamā karne wāloñ kī chīkheñ āsmānī lashkarōñ ke Rab ke kānoñ tak pahuñch gaī haiñ. ⁵ Āp ne duniyā men aiyāshī aur aish-o-ishrat kī zindagī guzārī hai. Zabah ke din āp ne apne āp ko moṭā-tāzā kar

diyā hai. ⁶ Āp ne rāstbāz ko mujrim thahrā kar qatl kiyā hai, aur us ne āp kā muqābalā nahiṁ kiyā.

Sabar aur Duā

⁷ Bhāiyo, ab sabar se Khudāwand kī āmad ke intazār meṁ raheñ. Kisān par ghaur kareñ jo is intazār meṁ rahtā hai ki zamīn apnī qīmtī fasal paidā kare. Wuh kitne sabar se Ḳharif aur bahār kī bārishon kā intazār kartā hai! ⁸ Āp bhī sabar kareñ aur apne diloñ ko mazbūt rakheñ, kyoñki Khudāwand kī āmad qarīb ā gaī hai.

⁹ Bhāiyo, ek dūsre par mat burburānā, warnā āp kī adālat kī jāegī. Munsif to darwāze par khaṛā hai. ¹⁰ Bhāiyo, un nabiyon ke namūne par chaleñ jinhol ne Rab ke nām meñ kalām pesh karke sabar se dukh uṭhāyā. ¹¹ Dekheñ, ham unheñ mubārak kahte hain jo sabar se dukh bardāsh karte the. Āp ne Ayyūb kī sābitqadmi ke bāre meñ sunā hai aur yih bhī dekh liyā ki Rab ne ākhir meñ kyā kuchh kiyā, kyoñki Rab bahut mehrbān aur rahīm hai.

¹² Mere bhāiyo, sab se baṛh kar yih ki āp qasam na khāeñ, na āsmān kī qasam, na zamīn kī, na kisī aur chīz kī. Jab āp “Hāñ” kahnā chāhte hain to bas “Hāñ” hī kāfī hai. Aur agar inkār karnā chāheñ to bas “Nahīñ” kahnā kāfī hai, warnā āp mujrim thahreñge.

¹³ Kyā āp meñ se koī musībat meñ phaṅsā huā hai? Wuh duā kare. Kyā koī khush hai? Wuh sataish ke gīt gāe. ¹⁴ Kyā āp meñ se koī bīmār hai? Wuh jamāt ke buzurgoñ ko bulāe tāki wuh ā kar us ke lie duā kareñ aur Khudāwand ke nām meñ us par tel maleñ. ¹⁵ Phir īmān se kī

gaī duā marīz ko bachāegī aur Khudāwand use ut्थā khaṛā karegā. Aur agar us ne gunāh kiyā ho to use muāf kiyā jāegā. ¹⁶ Chunānche ek dūsre ke sāmne apne gunāhoṇ kā iqrār karen aur ek dūsre ke lie duā karen tāki āp shifā pāeṇ. Rāst shakhs kī muassir duā se bahut kuchh ho saktā hai. ¹⁷ Iliyās ham jaisā insān thā. Lekin jab us ne zor se duā kī ki bārish na ho to sāṛhe tīn sāl tak bārish na huī. ¹⁸ Phir us ne dubārā duā kī to āsmān ne bārish atā kī aur zamīn ne apnī faslen paidā kīn.

¹⁹ Mere bhāiyo, agar āp meñ se koī sachchāī se bhaṭak jāe aur koī use sahī rāh par wāpas lāe ²⁰ to yaqīn jāneṇ, jo kisī gunāhgār ko us kī ghalat rāh se wāpas lātā hai wuh us kī jān ko maut se bachāegā aur gunāhoṇ kī baṛī tādād ko chhupā degā.

**Kitab-i Muqaddas
The Holy Bible in Urdu, Urdu Geo Version, Roman
Script**

copyright © 2019 Urdu Geo Version

Language: (Urdu)

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-05-06

PDF generated using Haiola and XeLaTeX on 11 Nov 2022 from source files dated 7 May 2022

123ff8cb-27b3-5817-a02a-22e67145fd30